



UKA 2025/23 – UKA 2025/24

15/10-2025

Hans Erik Enoksen

Uunga siunnersuut aatsitassat pillugit ingerlatallu tamatumunnga pingaarutillit pillugit inatsisartut inatsisaata (aatsitassanut ikummatissanullu inatsit) allanngortinneqarnera pillugu Inatsisartut inatsisaat (Aatsitassanut Ikummatissanullu Aqutsisoqarfik aamma Aatsitassanik Suliassa qarfinnut Avatangiisinut Aqutsisoqarfik pillugit aalajangersakkat atorunnaarsinneqarnerat)

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut

Naligiissitaanermullu Naalakkersuisoq)

(Siullermeerneqarnera)

Uunga siunnersuut aatsitassanut tunngasunik suliaqarneq pillugu Inatsisartut inatsisaata allanngortinneqarnera pillugu Inatsisartut inatsisaat (Aatsitassanut Ikummatissanullu Aqutsisoqarfik aamma Aatsitassanik Suliassa qarfinnut Avatangiisinut Aqutsisoqarfik pillugit aalajangersakkat atorunnaarsinneqarnerat, kiisalu kukkusumik innersuussinerup naqqinneqarnera)

(Inuussutissarsiornermut, Aatsitassanut, Nukissiutinut, Inatsissit Atuutsinneqarnerannut

Naligiissitaanermullu Naalakkersuisoq)

(Siullermeerneqarnera)

Qujanaq Naalakkersuisunut siunnersuutitut ukununnga.

Demokraatit siunnersuutitut tapersersorpaat aatsitassanullu tunngasut eqaannerusumik sunniuteqarluarnerusumillu allaffissornikkut ingerlanneqarnissaannik kissaatigisaq ilalernartillugu. Misilittakkat takutissimavaat, maannakkut sannaa suliassat aqutsisoqarfinnut arlalinnut agguataarlugit suliat oqimaannerunerannik kingusinaartitsinernillu kinguneqarsinnaasoq. Taamaattumik silatusaarneruvoq Naalakkersuisut periarfississallugit sunniuteqarluarnerusumik suliamik aaqquissuussinissaannut, suliat suliarineqarneri inuussutissarsiortunut inuiaqatigiinnullu iluaqutaanerunissaa nukittorsarneqarniassammat.

Siunnersuutitut tunngaviusut pingaarutillit attatiinnassavaat soorlu akuliutinnginnissaq, naammagittaalliorsinnaaneq aammalu apeqqutitut avatangiisinut tunngasunut kiffaanngissuseqarluni naliliinerit. Demokraatitut pingaarnerpaavoq, avatangiisit illersornerata inatsisitigullu illersorneqarnerup pingaartinneqaannarnissaat. Aamma sannaa allanngortinneqaraluarpuunniit.

Tusarniaanermi akissutivinnik isornartortalinnik marluinnarnik saqqummertoqarsimavoq. Sulisitsisut tamaat isigalugu siunnersuummut tapersiillutik nalunaarsimapput, ujartorluguli ersarissumik oqaatigineqassasoq, sulianik suliarinninnerup tigussaasumik siunissami qanoq aaqquissuunneqarnissaa. Tamanna isuma pissusissamisoorpoq, ataatsimiititaliami suliarineqarnerani annertunerusumik ersarissarneqartariaqartoq. Transparency International Greenland tikkuarsimavaa akulerutinnginnissamik pisariaqartitsinerup attatiinnarnissaa aammalu ammasumik suleriuseqarnissap qulakkeernissaa,



Avatangiisinut aqutsisoqarfik siunissami allanngussagaluarpas imaluunniit aaqqissuussaana allanngortinneqassagaluarpas. Taanna isumakulunneq paasinarpoq suleriaqqinnermilu pimoorunneqartariaqarluni.

Demokraatit pingaarutilittut isigaat, siunnersuutit allaffissornerup eqaannerulersitsinissaat aammalu innuttaasut tamarmik tatiginninnerisa attatiinnarnissaat. Tamanna ajornanngilaq, malittarisassanik ersarissunik qulakkiigaqaraanni aammalu ersarissunik attaveqaqatigiinnermik qulakkiigaqaraanni akisussaaffiup agguarnissaanut naammagittaalliornermilu aqqutissat pillugit.

Taamatut oqaaseqaateqarlutik Demokraatit siunnersuutit akuereqqullugit innersuussutigaa aammalu Inuussutissarsiornermut- aamma Aatsitassanut ataatsimiititaliami suliareqqinneqartussatut innersuussutigalugit.